

農
候
雜
占

農候雜占卷二

福州梁章鉅撰

男恭辰校刊

閏占

閏者陽之餘 見白虎通 按春秋元命苞夫閏正時以
作事厚民生之道

閏所以正中朔也 見漢書律歷志

三年長一寸雷驚縮一寸 七修類稿辨證類諸木中黃
楊爲難長按埤雅云黃楊木性堅俗言歲長一寸閏年
倒退一寸亦不盡然東坡詩云園中草木應無數只

有黃楊厄閏年按本草云今試之但閏年不長耳

梧桐可知日月正閏生十二葉一邊有六葉自下數一葉爲一月至上共十二葉有閏則十三葉視葉小者卽知閏何月也 見李昉太平御覽遁甲經

堯時有草生階每月朔生一莢月半則生十五莢十六日後日落一莢月晦而盡若月小餘一莢每以是占歷名曰蓂莢又曰瑞草 見帝王世紀 按此或定閏之所由來歟唐元稹數蓂詩辨時常有素數閏或餘青

蓮曰芙渠其根曰藕其行根如竹行鞭節生一葉一花花

葉相耦故曰藕藕生應月月生一節遇閏則益一節

見廣雅釋

萍實一名慈姑其苗直而葉三角倒銳種之水田一株結十二實若歲之有閏則有十三實 見蘇軾物類相感志

張季友閏賦以風以雨兮各得其序曰寒曰燠兮無悻於初

夜占

上八夜弗見參星月半夜弗見紅燈 農政全書上八日
宜晴主收成此夜若雨元宵亦雨引諺云云 按吳俗
以正月八日爲上八以參星卜一歲之水旱逮夜則老
稚聚觀參星過月西則多旱否則多水又八日爲穀以
此卜元日之晴雨故諺云云 見蘇州府志

吳農率以正月十五夜月明時立一尺五寸之表于地於
其夜子正一刻候之以驗水旱大抵據表之長而中分
之爲七寸半者二若影適及七寸半爲中正則是歲雨

暘以時五穀豐稔又以雨七寸半各十分之如影在七寸半以下爲不及不及則是歲主旱每短七分半則旱至一分又短則旱之分數亦如之影在七寸半以上爲太過過則主水每長七分半則水漲一分又長則水之分數亦如之 見負暄野錄

二月十二夜宜晴蓋二月最怕夜雨若此夜晴雖雨多亦無妨越人云二月內得十二個夜晴則一年內晴雨調勻又諺云十夜以上雨低田盡叫苦 見歲時通考

一夜春霜三日雨三夜春霜九日晴 田家五行云驚蟄

多霜主旱是月宜連夜霜

二麥不怕神共鬼只怕四月八夜雨 農政全書云立夏
夜雨多損麥蓋麥花夜吐雨多損花引諺云云 按田
家五行云八日晝雨主豐熟果實少大抵北方麥晝花
忌晝雨南方麥夜花忌夜雨

日暖夜中寒東海水也乾 同上言四月夜涼主少水引
諺云云按此旱年通行諺

十月雷鳴所當之鄉骸骨盈野入夜尤甚 見田家五行
冬至日南風爲虛風舊傳入夜半發者其民皆卧而弗犯

故其歲民得少病夜發而透至晝者民則中于虛風故
多病 見京房易占

除夜東北風主五禾大熟 見紀歷撮要

除夜犬不吠新年無癘疫除夜犬惡嘯新年多火盜 月
令廣義引諺云云

雨打五更日曬水坑 農政全書云五更有雨次日必晴
甚驗引諺云云 按吾閩亦有雨打五更頭行人不用
愁之說極驗惟一連至天明則不驗故又有雨怕落天
明之語

田家五行引諺云半夜五更西天明拔樹枝又云日晚風和明朝再多又風自日中起者必善夜間起者必毒日內息者亦和夜半息者必大凍

一夜起雷三日雨 見樂清縣志引東州人諺云云言雷自夜起必連日陰雨也吳諺亦云夜雷三日雨

農政全書云夏秋之間夜晴而見遠電俗謂之熱閃在南主久晴在北主便雨引諺云云又云北閃俗謂之北辰閃主雨立至諺云北閃三夜無雨大怪言必有大風雨也 又見臺笠須知

一個星保夜晴 同上引諺云云此言雨後陰久但見一

二明星此夜可晴

天下太平夜雨日晴 見田家五行言不妨農也

明星照爛地來朝依舊雨 同上言久雨天正當昏黑卒

然雲開便見滿天星斗豈但明日不晴當夜卽恐雨至

若夜半後漸漸雲開雨止星月朗然則又主晴無疑也

按西溪叢話亦引諺云乾星照溼土來日依舊雨又按

王建詩照泥星出依然黑陸放翁詩夜夜溼星占雨候

僧善珍詩照泥星復雨皆用此諺

氣占

正月朔旦四面有黃氣其歲大豐有青氣雜黃主螟蟲赤
氣大旱黑氣大水 見物理論按黃帝用事土氣均和
四方大熟

河有雲氣狀如船若一匹布維河不出十日大雨 見天
文要集

斗旁有氣往往而黑狀如禽獸大如皮席不出三日必雨
同上

暴有黑雲氣如船發于日下當卽雨 見京房易飛候

凡氣欲出似甑上氣勃勃上升氣積爲霧霧爲陰陰氣結爲虹霓暈珥之屬 見隋書

六月三日有霧則歲大熟 見望氣經按六月亦作七月地氣發天不應曰霧 見爾雅

蜺日旁氣也妻乘夫則見之 見京房易占 又按楊慎總錄引諺云日出雨落公姥相撲謂陰陽之氣不和當時必有虹也

十一月一陽爻初起至此始徹陰氣出地方盡寒氣迸在上寒氣之逆極故謂大寒 見三禮義宗

十一月中遇東南風謂之歲露有大毒若饑感其氣開年
著腹疾 見臺笠須知

夏至日中赤氣出直雜正氣出右萬物半死出左赤地千
里 見易通卦驗

保章氏以五雲之物辨吉凶水旱豐荒之祲象 周禮註
云雲氣青爲蟲氣白爲喪氣赤爲兵荒氣黑爲水氣黃
爲豐年

埤雅水氣在天爲雲水象在天爲漢又詩雲漢箋天河水
氣也精光轉運于天按天官書漢者金之精氣又漢者

金之散氣其本曰水漢星多則多水少則旱故曰河漢者水之氣

天氣蒸溽溼氣蒸騰望遠氣模糊將有雨 見謝厚菴仰

觀錄

天低氣昏遊氣迷漫雲氣四塞者雨徵也 見同上

雷者太陽之激氣也正月陽氣動故始雷五月陽氣盛故雷迅秋冬陽氣衰故雷潛 見王充論衡

白氣掩北斗並日月廣密者大風惡雨之象每月初一日看北斗間有白氣潤澤主本月多風雨每月交節氣日

早晨有丹霞之氣主節內風雨順時 見陶朱公書

曉看東方有五色氣如錦過西者當日風雨如雲霧氣至
中天而止者應三日後雨日沒時看五色氣自西而東
者亦然 同上

寒熱占

春寒多雨水 農政全書云春月宜和煖而反寒必多雨
引諺云云又田家五行志云元宵前後必有料峭之風
謂之元宵風故春寒

驚蟄不凍蟲寒到五月中 見沅湘農諺

清明斷雪穀雨斷霜 見吳下田家志言天氣之常可漸
暖也

上已有霜三月冷 見月令廣義

四月麥秀寒五月溫和暖 見吳下田家志方言

四月八凍殺鴨 明詩綜引黔中諺

黃梅寒井底乾 見月令廣義謂立夏不宜熱熱則有暴

水也

清明穀雨寒死老鼠小滿立夏寒死老郎爸 此間諺謂

四月以前多見寒也

未喫端午糴寒衣未可送 見吳下田家志 又陸務觀

五月十日曉寒詩短褐竟未送自註引此諺作布襖未

可送俗謂典質曰送也

土候地中寒溫以宜 見李庚西都賦

夏至有雷三伏冷 湧幢小品引俗諺又作夏至有風三
伏熱又感精符作夏至酉逢三伏熱

六月六曬得雞蛋熟 見古占年語謂六月宜熱于田有
益也

別錄云燕有谷寒不生五穀鄒衍吹律而氣暖穀生因名
黍谷

雨下便寒晴便熱不論春夏與秋冬 嶺外問答云桂林
氣候與江浙相似再南數十里便異冬月久晴不離葛
衣紈扇夏月苦雨則須襲被重裘大抵早溫晝熱晚涼

農事雜錄
夜寒一日而四時之氣備

六月不熱五穀不結 農政全書引諺云云又云六月蓋
夾被田裏不生米言天氣涼則雨多水大沒田也按明
詩綜亦用此諺

熱極生風 此通行諺

六月蓋夾被田裏無張屁 玉芝堂談薈引諺

早立秋暮颼颼夜立秋熱到頭 此通行諺頗不爽熱到

頭一作熱不休此于一日之早晚辨立秋也 按田家

五行云六月秋便罷休七月秋熱到頭此于兩月之間

分立秋之早晚同一義也

過了七月半人似鐵羅漢 見古占年語謂酷暑已退可望秋收農人有恃也

田怕秋乾人怕老窮 月令廣義引諺云云言秋中畏旱旱則必熱秋熱則傷稻也 按通俗編亦云田怕秋旱人怕老貧

踏梯摘茄子把扇吃餛飩 嶺南地暖草萊經冬不衰故蔬圃之中栽茄者宿根二三年漸長枝幹乃成大樹每熟時梯樹摘之又其俗入冬好食餛飩往往稍熱食須

用扇故俗語云云 見羣居解頤

十月十六日爲寒婆生日晴主冬暖 農政全書云此說得之崇德舉人徐伯和言彼處客旅遠出專看此日若晴暖則不必多備衣服極有驗也

一日赤膊三日頭縮 同上言十二月謂之大禁月忽有一日稍暖卽是大寒將至故諺又云大寒須守火無事不出門又云臘月廿四五錐刀不出土按田家五行志赤作脫頭縮作齷齪

大熱無過未申大寒無過丑寅 見田家五行志

火中寒暑乃退 見左傳

雨春夾一冬無被暖烘烘 農政全書云立春在殘年主
冬暖引諺云云 月令廣義又作雨春夾一冬牛欄九
个空傳家寶又作一年兩頭春餓死經紀人

夏至未來莫道熱冬至未來莫道寒 豹隱紀談引鄉語
云云土俗以二至後九日爲寒燠之候也

夏至後 一九至二九扇子不離手 按通俗編
不作弗 三九二十

七吃茶如蜜汁 按通俗編作
冰水如蜜汁 四九三十六爭向路頭宿

按吳下田家志
作拭汗如出浴 五九四十五樹頭秋葉舞 按田家五行
志並通俗編

同秋

六九五十四乘涼不入寺

按吳下田家志作乘涼入佛寺

七九六

十三夜眠尋被單

按田家五行志作上牀尋被單

八九七十二被單添

夾被

按吳下田家志作思量蓋單被

九九八十一家家打灰墜

按墜塼坯也

冬至後

一九至二九相喚不出手

按委巷叢談相喚作招呼

三九二

十七籬頭吹簞簟

按帝城景物略作簞簟簞通俗編籬作簞

四九三十六夜

眠如路宿

按帝城景物略古今諺路作露通俗編路宿作驚縮

五九四十五太陽

開門戶

按通俗編作窮漢街前舞

六九五十四貧兒爭意氣

按帝城景物略

作口中

七九六十三布衲兩颺颺

按田家五行志作布衲簷頭簷八九

七十一猫狗尋陰地

按吳下田家志委巷叢談又帝城景物略狗作兒

九九八

十一犁爬一齊出

按田家五行志爬作耙

四時皆是夏一雨便成秋 海南地多暖少寒木葉冬夏常青然彫謝則寓於四時不似中土之必在冬也四時晴冽穿單衣陰晦須挾纊 見海槎餘錄

冬至極低天運近南故日去人遠斗去人近北天氣至故寒冽也夏至極起天運近北故斗去人遠日去人近南天氣至故蒸熱也 見姚信听天論

冬寒而數日忽暖者雪候也冷而羣鳥飛者亦雪候 見

仰觀錄

冬雨必暖夏雨必涼 見葛洪西京雜記

水占

汾水宜麻濟水宜麥河水宜菽雒水宜禾渭水宜黍江水宜稻淮南子云稻生於水而不能生於湍瀨之流水而生青靛天公又作變農政全書云才陽月靛青主有風雨引諺云云

正月上旬稱水可卜一年水旱初一起用一瓦瓶每朝取之重則雨多輕則雨少初一日占正月初二日占二月餘仿此見陶朱公書

水底生青苔卒逢暴水來田家雜占云水底生苔主有

暴水引諺云云

大水無過一時周 同上云此是吳中太湖東南之常事
凡初冬大西北風湖水泛起吳江人家俱浸水中風息
復平謂之翻湖水引諺云云

水邊經行聞得水有香氣主雨水驟至極驗或聞水腥氣
亦然 同上

河內浸成包稻種既沒復浮主有水 同上

十月水過灘大小麥一定灘 樂清縣志云十月水則來
歲麥歉引諺云云

一點雨似一個釘落到明朝也不晴一點雨似一個泡落到明朝未得了 農政全書引諺云云言雨著水面上若起釘或有浮泡主卒未晴

冬至前後瀉水不走 吳下田家志引方言

四川嘉定州有金燈山山趾有淵每歲人日太守于此脩油卜故事謂以油灑水面觀其紋占一歲豐歉

洛陽婦女每於三月以薺花點油祝而灑之水中若成龍鳳花卉之狀則歲豐人吉謂之油花占 見圖經

四川通志篆水在廣安州其年豐水紋宛成篆籀文人羣

見以之爲占云

新喻州有水湍沸湧白沙如米兩岸堆積無窮呼爲米沙
以之候歲若一岸偏饒則其方必豐收 見王孚安成
記

新昌水有一沙堆在縣東北形如覆船每年豐稔水沙堆
積不動若沙移向岸則其年儉 見劉澄之鄱陽記

史記趙中大夫白公復穿渠引涇水首起谷口尾入櫟陽
溉田四千餘頃名之曰白渠人歌曰鄭國在前白渠起
後舉插爲雲決渠爲雨涇水一石其泥數斗且溉且糞

長我禾黍衣食京師億萬之口

魏史起爲鄴令引漳水灌鄴田河內人歌曰引漳水灌鄴
旁千古斥鹵生稻粱 見文獻通考

史記云水工鄭國鑿涇水自中山西郊苑口爲渠並北出
東注洛三百餘里以溉田收皆畝一鍾于是關中爲沃
野

杜家溝在成都府資縣池水一泓澄徹清冷下卽龍泉祠
將雨雲生竅穴霧彌空谷 見成都志

陶朱公書云地面溼并出水珠如汗主暴雨柱礫水流亦

然得西北風解散則無雨

重則水大輕則水小 范致能岳陽風土記云傍湘之民
歲暮取江水一斗歲旦取江水一斗較其輕重則知其
年水勢高下按此與除夕占同

火占

火耕水耨 見前漢成帝紀

田祖有神秉畀炎火 見詩小雅

燒薙行水利以殺草如以熱湯可以糞田疇可以美土疆
見禮月令

火日多雨 七修類稿云納音雖火日其實得一數則天
一己生水故火日多雨

上火不落下火滴沍 見崔實農家諺言丙日不雨丁日
必雨也滴沍雨聲

火流星必定晴 田家五行志久陰天息燈燈煤如炭紅
良久不過明日喜晴故諺又云久晴後火煤便滅主來
日雨

大火中則種黍菽 淮南子術注 大火東方蒼龍之宿
又按火大星也

扶南東有火山國其山雖經霖雨火常燃山中有鼠時出
山邊求食人捕得之以毛作布名火浣布可以爲衣
見山海經

南方有炎火山四月生火十二月火滅火滅之後草木漸

生枝葉至火然草木葉落如中國寒時也取此木爲薪
炊飯燃之不盡其皮可織衣服之亦名火浣布 見元

中記

積油萬石則自然生火 見博物志云昔泰始中武庫火
積油所致也

火井沈熒于幽泉 左思蜀都賦注火井在臨邛縣欲出
其火先以家火投之須臾隆隆如雷聲焰出通天光輝
十里以筒接之有光無炭又按火井卽鹽井也

槁竹有火弗鑽不燃 見淮南子

陸游曰火山其地鋤深則烈燄不妨耕種 見正字通

連渾府遙火山西有井深不見底炎氣上升常若微電以
草爨之則煙生火發故名熒臺 見郡國志

太原郡東有崖山每農田亢旱土人燒山以求雨俗傳崖
山神娶河伯女故河伯見火必降雨救之 見酉陽雜
俎

薙氏殺草夏至日而夷之秋繩而芟之冬至日而耜之若
欲其化也則以火火變之註謂以火燒其所芟薙之草
已而水之則土亦和美 見周禮

積灰知風懸炭識雨 釋贊甯感應類從志注云以榆化
灰聚置幽室中天若將風則灰皆飛揚秤土炭二物使
輕重等懸之雨則炭重晴則炭輕

麥金也金玉而生火王而死 見許氏說文

山占

山海者財用之寶也田野闢則五穀熟而寶路開 見鹽

鐵論

豐山著帽豐年之兆 滁州豐山在州面南五里沛豐人
常居之故名上有漢高祖廟天欲雨常有雲氣發山椒
若巾帽然州志豐山北爲幽谷地污下邃密四周皆山
昏旭異態東下百餘步爲柏子龍坑一名龍潭西北頂
上有雙燕洞深四五丈能出龍雨故諺云云

峴山張蓋雨滂沱 三水小牘安定郡有峴陽峰峰上有

池如雨則雲起池中若車然故諺云云

射的白米一百射的元米一千 水經注會稽有射的山
遠望如射侯土人以見之明暗占米價之低昂一百一
千言價之高下也

胸山戴帽卽雨蓋 東原錄海州胸山俗言云云蓋謂雲
出覆冒其上爲雨候也

五蓋雪普米賤如土雪若不均米貴如銀 一統志彬州
五蓋山於冬至以雪占年按湘中記五蓋山山有五峰
望之如蓋鄉人每歲以雪占年豐故土語云云

雨未晴看雲靈 肇慶府射木山在陽春縣東南十五里
巍峩葱鬱爲縣治山一名雲靈山雲幕其上則雨立至
故諺云云 見一統書并潛確類書

鄱陽長壽山形似馬白雲出於鞍中崇朝而雨 見宋永
初山川記

南山瀑布非朝則暮 武功縣太白山甚高上常積雪無
草木半山有橫雪如瀑布則澍雨人常以爲候驗之如
離畢焉故語云云

廬山戴帽平地安竈廬山繫腰平地安橋 廬山雖號九

屏然其實不甚深山行皆繞大峰之足遠望只一獨山
然比他山爲最高雲繞山腹則雨雲翳山頂則晴故諺
云云 見吳船錄又按述異記云廬山有康王谷北嶺
上有一城號爲劉城天每欲雨輒聞山有鼓角笳簫之
聲村人以爲候又按廬山記云天將雨則山有白雲或
冠峰巖或亘中嶺謂之山帶不出三日必雨又云天將
雨山氣如車馬

襄陽石梁山出雲應驗符合農人候之若白雲起定雨黃
雲起則風黑雲起則多病 見物類相感志

朝鮮有鼇山東一谷名曰高沙天將雨先期而鳴噴出雲
氣雲入洞則雨出洞則風大鳴則卽日有驗小鳴二三
日乃驗 見朝鮮志

汝南臨汝縣有小山曰崆峒其山洞穴如盎將大雨則白
犬自穴出田夫以爲候亦名玉燭峰 見三水小牘
陶朱公書云凡遠山之色清朗主晴昏暗主雨小山不出
雲者忽然雲起主非常大雨

海占

海水熱穀不結海水涼穀登場 明詩綜瓊州以海水占

年每海水熱則荒土諺故云

海嘯風雨多 見玉芝堂談薈

海水知天寒 見古詩

十月忌初五海豬要起舞 見測海錄言海風于此日起也

十一月初八日得壬主海翻 見田家五行

流波山下有然海千里民每汲之以代油秦始皇使人泛

多艘往山島取仙草舟人不知水性以燭跋投海火大發遍海延燒傷舟無數自此罕舟行惟於海畔汲用而已 見漂栗手牘

華亭市有一物如水桶而無底非金石竹木所製未有知其名與所用者有舶商見之以三百緡易之曰此名海井能收鹹味海航必載淡水今得此但以大器貯海水置海井於中就中汲之皆淡水矣 見癸辛雜志

潮占

初一月半午時潮 初五二十夜岸潮天亮白遙遙 下
岸之潮登大汛 乾晴無大汛雨落無小汛 田家五
行志每半月逐日候潮時詩訣云午未未申申寅寅卯
卯辰辰巳巳午午未未申申寅寅卯
論故諺云云十三二十七名曰水起是爲大汛各七日
二十初五名曰下岸是爲小汛亦各七日故諺歷云云
凡天道久晴雖當大汛水亦不長若小汛雖雨落亦不
以爲意也

卯酉之月陰陽之交故潮大于餘月大梁析木河漢之津也朔望之後天地之變故潮大於餘日日月會于酉曰

大梁會于寅曰析木

見宣昭潮候記

月有盈虛潮有起伏故盈於朔望虛於兩弦息於朏朓消于朏魄而大小準焉 同上

月之精主水是以月盛而潮大 見抱朴子

潮至八月十五獨大於常潮遠觀若素練橫江混混庵庵聲若雷鼓 見錢唐潮候圖 又按叢語姚寬曰或問

四海潮皆平惟浙江濤至則亘如山岳奮如雷霆其故

何也或云夾岸有山南曰龜北曰赭二山相對謂之海門岸狹勢逼激而爲濤

錢武肅王以潮爲田患始築捍海塘在侯潮門外潮水晝夜衝激版築不就因命強弩數百以射潮頭又禱于胥山祠旣而潮水避錢唐東激西陵遂成隄岸 見五代史

東海有牛魚狀如牛剝其皮懸之潮至則毛起潮退則毛伏 見博物志

鰮魚長數千里穴居海底入穴則潮上出則潮下出入有

定故潮長有期 見風土記

瓊海之潮半月東流半月西流 見寰宇記

移風縣有鷄鳴聲清長如吹角潮至則鳴故名潮雞 見

異物記又孫綽望海賦石鷄清響而應潮

候潮草葉間有菰潮至卽開退卽合 見興化府志

金陵鍾山頭陀寺第一峰有應潮井其泉與江潮盈縮相

應 見地志

桂林聖水巖子時潮上午時潮落 見廣西志

唐書地理志注云福州長樂郡太和七年築立十斗門以

禦潮旱則瀦水雨則洩之盡成良田

樂史太平寰宇記云蠺山在海中潮上半沒潮落方見故其上多蠺

海上人云蛤蜊文蛤皆一潮生一暈見姚寬西溪叢語朱子名臣言行錄云運河失湖水之利遂取給於江潮潮濁多淤河行闡闡中三年一淘爲市井大患公始至浚二河以茅山一河受江潮以鹽橋一河受湖水復造堰閘以爲潮水蓄洩之限然後潮不入市按公卽蘇軾也

石占

五嶽皆觸石而出雲不崇朝而雨 見尚書大傳

臨賀有石方二丈有磨刀斧迹春秋常明淨秋冬則苔穢
名雷公磨石 見孟奧北征記

俚山縣有一山獨立峻絕西北有石穴以燭行百步許有
大石相去丈許俗名一爲陰石一爲陽石每水旱爲災
鞭陰石則雨鞭陽石則晴 見荊州記

萍鄉西城津有玉女岡天欲雨輒先涌五色氣于石間俗
稱玉女披衣 見王采安成記

零陵山有石燕雨卽飛止還爲石 見湘州記

荊州永豐縣東鄉有卧石長九尺六寸其形似人而通體
青黃隱起田若遇旱眾農舉而祭之小舉小雨大舉大
雨 見酉陽雜俎

武昌城西有石鼓山山上有三石鼓鼓鳴則雨至 見武
昌志

蘇頲有一錦紋花石鏤爲筆架置於席間每天欲雨卽津
如汗逡巡而雨農人望雨者每就此爲候 見王仁裕
開天遺事

鬱林郡有大石牛歲旱殺牛取血和泥泥石牛背則天雨
去泥卽晴 見廣州記

臨封縣西石龍巖中有長石如龍歲旱洗之卽雨至 見
一統志

吳興故彰縣有梅溪山山根直豎一石高可百餘丈四面
陡絕其上有盤石員如車蓋恆轉如磨聲若風雨土人
號爲石磨轉駛則年豐遲則年儉農人每以爲候 見
續齊諧記

南康記覆笥山平湖中有石雁浮水面每至炎氣代序則

飛翔若知感候又漢陽記廬山頂上有池中列三石雁
每霜降則飛

汶山有鹽石煎之得鹽 見華陽國志

臨川記縣中石廩其中可容千斛廩口暗中有收放開則
則歲豐閉則歲歉

井占

鬱林郡有古井名曰司命井半甘半淡潛通江海冬夏常盈周給闔境其水若竭卽有荒歉之災每以爲候 見廣州記

聖井岡在臨城東北井四時不竭每遇田旱禱雨立應 見南昌志

夏至是日浚井改水 見續漢書 按春秋考異郵曰夏至井水躍故于是日改水

隴中乏鹽惟天水一井汲之可煮爲鹽 見十六國春秋

藍田縣玉案山有井水在井中常作冰雖夏不釋長安不藏冰于此取之 見輿地記

藝文類聚稱養生要術十二月臘夜持椒卧井旁無與人言內椒井中可除溫病甚驗

凡欲穿井于夜氣清明時置水數盆于地看何盆星光最大而明其下定有泉源 見玉厯

廬陵城中有一井分二色水或青或黃黃者若灰汁取作糜粥皆作金色每以濟饑土人名灰汁爲金因名金井 見廬陵異物志

衛有一夫負缶入井出而灌田終日竟一區鄧皙過下車
教之曰有機重後輕前命曰桔槔終日溉田百區不倦
見說苑

青州刺史張士平中年夫婦皆瞽一日遇書生爲開井一
眼汲新泉洗之目均如初因留其說以救世其要曰子
午之年五月酉戌十一月卯辰爲吉丑未之年六月戌
亥十二月辰巳爲吉寅申之年七月亥子正月巳午爲
吉卯酉之年八月子丑二月午未爲吉辰戌之年九月
未申三月丑寅爲吉巳亥之年十月申酉四月寅卯爲

吉按其方位年月日時鑿井卽爲福地土平拜受訖書
生轉瞬失去蓋太白星官也 見神仙感遇傳

穿井多有毒氣五月五日以雞毛試投井毛直下者無毒
若迴旋不可食 見葛仙翁傳

冰占

春無冰梓慎曰今茲宋鄭其饑乎歲在星紀而淫於元枵以有時災陰不堪陽蛇與龍宋鄭之星也宋鄭必饑元枵虛中也枵耗名王虛民耗不饑何爲見左傳光和六年冬東海東萊郡中冰厚尺餘冬大有年

見後漢書

冰者兵之象 見公羊成十六年傳

冰方盛水澤腹堅令告民出五種 見禮記

冰結後水落主來年旱冰結後水漲名上水冰若堅厚主

來年大水 見農政全書

冰泮而農桑起 見家語

東海員嶠山有冰蠶長七寸有鱗角以雪覆之始爲繭色
五采織爲文錦入水不濡入火不燎 見拾遺記

見一葉之落知歲將暮觀瓶中之冰知天下之寒 見淮
南子

景公伐魯得東門無澤問曰魯年穀何如對曰陰不凝陽
冰厚五寸者寒溫節也寒溫節則政平政平則年穀熟
請禮魯以息怨 見晏子

北人驗時以天明三星入地爲冰河之候正德丙寅冬至
在十一月二十八日都下寒最遲而河冰亦遲凍是月
望日與諸吉士早朝其試觀之黎明三星正入地而河
冰亦適合云 見金臺記聞

二月二日見冰主旱 見陶朱公書

天占

神農之時天雨粟神農耕而種之 見周書

力田不如逢年 見史記

天乃雨反風禾則盡起 見書金縢

椹釐釐種黍時 凡黍稷三月上旬種時爲上時四月上旬爲中時五月下旬爲下時夏種黍稷與植穀同時非夏者大率以椹赤爲候故諺云云 見齊民要術

夏至後不沒狗 但雨多沒橐駝 五月及澤父子不相借 凡種麻夏至前十日爲上時至日爲中時至後十

日爲下時孫注云麥黃種麻麻黃種麥均良候也諺云云者言及澤急也夏至後則匪惟淺短皮亦輕薄此亦趨時不可失也父子之間尙不相假借極言天時之可貴耳 同上

五月鋒八月耩 見楊慎古今諺按鋒鋤也耩壅苗根五月穰種八月犁種畝收十倍 見齊民要術

頭有二毛好種桃立不踰膝好種橘 果中易生者莫如桃而結實遲者莫如橘諺云云者言桃易待橘難待須及時爲之也 見曲洧舊聞

寒食過了無時節娘養花蠶即種田 見吳下田家志方

言

上旬種者全收中旬中收下甸下收 見齊民要術又引
襍陰陽書曰禾生于寅壯于丁午長于丙老于戌死于
申惡于壬癸忌于乙丑凡種五穀以生長壯者多實老
惡死日種者收薄以忌日種者敗傷又用成收滿平日
爲佳又引汜勝之書曰小豆忌卯稻麻忌辰禾忌丙黍
忌丑秫忌寅未小麥忌戌大麥忌子大豆忌申卯凡九
穀各有忌日種之不避其忌則多傷敗

十月無工只有梳頭喫飯工 吳下田家志言天漸短而時可貴也

社後種麥爭回耬社前種麥爭回牛 士農必用引農語云云言奪時之急也

雨師好黔風伯好溟 龍洞田皆石底上惟寸土五日不雨則苗枯槁諺云云者言無五日不雨也雨師豈真有所好哉良由彼蒼愛人之至惟恐禾荒民饑耳又云大理有風花雪月四景下關風上關花蒼山雪洱海月今花斬伐無種風則處處有之下關稍盛耳自九月起至

次年五月無日不排山倒嶽聲如嘶吼惟黎明稍息辰刻復起過下關橋必下蓋整冠否則飛颺而去矣下關南望萬里壁立一水中通其曲折處卽風穴故雖晴和日此處仍大風不息豈風雨果有所好哉蓋滇西瘴氣特甚有風則散亦上天愛人之至故生風穴於其間耳要開吳淞江除是海龍王湧幢小品吳淞江久湮童謠云云均謂工決難成後巡撫海忠介倡議開濬而董其事者則推官龍宗武同知王成樂也其言始驗當時累月不雨工故易集是貴天時焉按一申野錄所載除是

作須是憶余於道光七年在蘇撫任內留心水利以吳淞江涇塞多年 奏請籌款挑濬適值累月不雨半年竣事至今賴之雖曰人事豈非天時哉次年 奏入以挑濬吳淞江議敘加一級前塵昨夢回首廿年附記於此

地占

周公時天下太平邱陵高下皆熟 見鹽鐵論

一季種田三季收稻 三佛齊西北濱海舶入淡港入彭家裏舍易小舟入港達其國土沃人稠地宜稼穡諺云云言收獲廣也 見瀛涯勝覽

三月榆莢雨時高地疆土可種秔 見汜勝之書

雄田 交阯田最爲高腴舊有君曰雄王其佐曰雄侯其田亦曰雄田 見番禺雜記

溼耕澤耨不如歸去 齊民要術耕田篇凡耕高下田不

問春秋不須燥溼得所爲佳若水旱不調甯燥不溼孫注云燥雖耕塊一經得雨地則粉解溼耕堅垆數年不佳諺云云者言其不審土宜而終于無益也

斥水插秧乘船割稻 譚苑醍醐卷五周禮三農有兩訓先鄭云山農澤農平地農也後鄭云原與隰及平地余謂先鄭之說爲是山農南方之刀耕火種巴蜀之雷鳴田是澤農廣東之葑田雲南之海簾是卽諺云云者也若原隰平地只可言中原不可該邊甸也

坐賈行商不如開荒 荆川稗編王盤農書今漢河淮潁

率創開荒地當年多種脂麻等有病收致富者如舊稻
塍內開畢便撒稻種直至成熟不須薅拔緣新開地內
草根死淨無荒可生更年年揀剔別無稗莠所收常倍
于熟田蓋曠間既久地力甚足也諺云云言其獲利多
也

十年九不收一收勝十秋 武定府聶家窪在商河縣西
舊治縣界有七十二窪遇豐大收遇潦則一苗不遺故
諺云云

嬾漢種蕎麥嬾婦種菜豆 羣芳譜穀譜耕蕎麥地若耕

二遍只耘一遍言不論地之瘠薄亦可種也諺又云種
菜豆地不宜肥而宜瘦

東路檳榔西路米粳 明詩綜瓊州東界地瘠雖以羊骨
壅田終鮮獲腴壤多在西故諺云云 元黃鎮成詩土
薄良苗稀稊稗日以長言土薄則苗少而莠多也

高田種小麥終久不成穗 見羣芳譜按爾雅翼古稱高
田宜黍稷下田宜稻麥小麥例須下田故古歌亦云云
上鄉熟不抵下鄉一鍋粥 論浙西閉糴狀本路惟蘇湖
常秀等州出米浩瀚常飽數路漕輸京師自杭睦以東

衢婺等州所產微薄不了本莊所食諺云云蓋全仰蘇秀等州來路以足官民之用 見東坡集

蘇常熟天下足

吳郡文粹
常作湖

常州韓牛岡記方朝廷在故

都時實仰東南財賦而吳中又爲東南根柢語云云蓋謂此間尤爲國用所仰遲速豐耗天下休戚在焉 見

渭南文集又按大學衍義補邱濬論國用臣按東南財賦之淵藪也韓愈謂賦出天下而江南居十九以今觀之浙東西又居江南十九而蘇松常嘉湖又居兩浙十九也考洪武中天下夏稅稅糧以石計者總二千九百

四十三萬餘而浙江布政使司二百七十五萬二千餘
蘇州府二百八十萬九千餘松江府一百二十萬九千
餘常州府五十五萬二千餘是則一藩三府之地其民
租比天下爲重其糧額比天下爲多竊以蘇州一府計
之以準其餘蘇州一府七縣其墾田九萬六千五百六
頃而居天下八百四十九萬六千餘頃田數之中竟出
二百八十萬九千石稅于天下二千九百四十三萬額
內其科徵之重如此故諺又云蘇松熟天下足考渭南
文集松作常蓋宋時松江屬秀州也

湖廣熟天下足 湖廣古荊州地江漢若帶衡荆作枕洞庭雲夢爲池中國之地四通八達莫楚若也楚固澤國耕稼甚饒一歲再獲柴桑多仰給焉諺云云者言土地廣沃而長江轉輸便易非他省比也 見地圖綜要湖廣總論

姜思度有巧思知溝洫之利所在必發眾穿鑿先是太史令傅孝忠善占星時人語曰傅孝忠兩眼看天姜師度一心穿地 見唐書

夏旱修倉秋旱離鄉 浙西地卑積水春夏厭雨故諺云

卷之二
云若浙東地高燥過雨卽乾得雨卽耕然常患少耳

見後山叢談

荊州記城南六里有溫泉下數十畝十二月下種三月便
登一年可三收

紹興五年江東帥臣李光言閩越之境皆有湖陂湖高于
田田高於江海旱則放湖溉田澇則決田水入海故無
水旱之灾 見宋食貨志

人占

最喜立春晴一日農夫耕田不費力 見沅湘農諺言田
于此日最要緊好著力也

子欲富欲黃金覆 麥生黃色傷於太稠稠者鋤而稀之
秋鋤以棘柴耨之以壅麥根至春凍解轉柴曳之突絕
其乾黃頂麥生復鋤之到榆莢時注雨止候土白背復
鋤似此不惜力則收必倍 見齊民要術

土之生五穀也人善治之則畝數益一歲而再獲之 見
荀子

智如禹湯不如常耕 齊民要術序自天子至庶人四肢
不勤思慮不周而事治求贍者未之間也神農倉頡聖
人也其於事也有所不能矣故趙過始於牛耕實勝耒
耜之利蔡倫立意造紙豈方縑牘之煩且耿壽昌之常
平倉桑宏羊之均輸法益國利民不朽之術也故諺云
云樊遲請學稼孔子答曰吾不如老農聖賢有所未達
而況于凡庸者乎書云不昏作勞不服田畝越其罔有
黍稷信然

長老種芝麻此事差又差

按七修類稿事物類種芝麻

必夫婦同下種收時倍多否則結稀且不實也諺云云者以僧無婦言雖用力而不得其人耳

一年之計莫如種穀十年之計莫如樹木 齊民要術序
天子親耕皇后親蠶況夫田父而懷窳惰乎李衡於武陵龍陽汎洲上作宅種橘千樹臨卒勅兒曰吾州里有千頭木奴歲上一匹絹亦足用矣吳末甘橘成歲得絹數千疋恆稱太史公所謂江陵千樹橘與千戶侯等者也樊重欲作器物先種梓漆時人嗤之然積以歲月皆得其用向之笑之者咸求假焉此人功之不可已也

鋤頭三尺澤 凡種麻地須耕五六遍倍蓋之以夏至前十日下子又鋤兩遍仍須用意抽拔細弱不堪留者卽去卻一切但依此法除蟲災外雖小旱不至損何者緣蓋磨數多故也又鋤耨不斷其時故諺云云古人云耕鋤不以水旱息功必獲豐年之收 見齊民要術雜說

糞田勝如買田 凡農圃之家務要計置糞壤須用一人一牛或驢駕雙輪小車諸處搬運積糞日久積少成多施之種藝稼穡倍收歲有增羨此人工之上計也夫掃除之限腐朽之物人視之而輕忽田得之爲膏腴惟勤

於力田者知之誠以糞非貴重到處可立致所貴惜糞如惜金變惡爲美種少收多故諺云云 見荆川稗篇
王盤農書

北人水旱聽命於天 黃河之爲中州患固矣然而有利存焉人自棄之耳使近河之民效南方水車之製而又分區築港可通百里之遠則人力正可爲利也或仿古井田之制每田百畝四隅及中各穿一井每井可灌田二十畝四圍築以長溝深濶各丈餘旱則挈井之水以灌田潦則放田之水以入溝無非盡力乎溝洫耳且穿

田築溝之費可按畝科派從此一勞永逸不但免害卽以興利隨時用力不誠足恃哉 見天下郡國利病書引諺云云

荷鋤待雨不如決渚 見天祿閣外史言勿貪天功而廢人力也

農勤於朝女勤於宵宵必顧杼朝必顧雨 同上言得時無怠也

收麥如救火 羣芳譜大抵農家之忙無過蠶麥若遷延從事秋苗亦悞鋤治言人力之不可緩也

麻耘地豆耘花 種樹書種諸豆子油大麻等若不及時
去草必爲草所蠹耗雖結實亦不多諺云云者麻須初
生時耘豆雖開花亦可耘言須相緩急以施力也

八月初一雁門開懶婦催將刀尺裁 見吳下田家志

近家無瘦地遙田不富人 農書居處篇引諺云云言民
去田近色色利便可施力以致富也